

# ଜାକୁବଙ୍କ ପତ୍ର ଜାକୁବ୍‌ନେ ଉଲିଆଃ ଜାକୁବ୍ ବଇ ବିସୟରେ ଉଠଡ଼ିକୁଗ୍ ସାମୁଆଁ

ଜାକୁବ୍ ଉଲିଆଃ ଜାକୁବ୍ ମିରେ ଖାତିଆରକ୍ଲେ ମୁଇଂ ରେମୁଆଁ ବାନ୍ ଗୁଆର୍ ତିଂଲେଃକେ । ଆକେନ୍ ଜାକୁବ୍ ତିଂଲେଃଏ ଜିସୁ କିସଟନେ ବୟାଣ୍ଡେ ଲେଃଗେ ଜା କି ପରତୁମ୍ ମଣ୍ଡଲିନେ ମୁଇଂ ନେତା ବାରି ଯିରୁଶାଲାମ୍ କୁକପାରନେ ମ୍ବା ରେମୁଆଁ ଲେଃଗେ ପ୍ରେରିଡ୍ ୧୫:୧୩ । ପ୍ରେରିଡ୍ ପାଉଲ୍ ଶ୍ରିଗ୍ ଜାକୁବ୍‌କେ ଗାଲାତିୟ ମଣ୍ଡଲିନେ କୁଟ୍ ତାଗ୍‌ତେ ଖାଆରଏ ଗାଲାତିୟ ୨:୯ । ଜାକୁବ୍ ଯିରୁଶାଲାମ୍‌ନେ ନେତା ଲେଃଗେ ତେସା ତିଂଲେଃଏ ଆଡ୍‌ଅରିଆ ବାସା ଲେଃଗେ ବେଲା ମେଁ ଆକେନ୍ ଉଲିଆଃ ଗୁଆରବଗେ ।

ଜାକୁବ୍ ଦେସ୍ ଅରିଆ ଚିନ୍‌ବିନ୍ ତିଂଲେଃକ୍ଲେ ଗମ୍ବାର୍ କୁଟୁମ୍‌ଇଂକେ ମେଁନେ ଉଲିଆଃନ୍ନିଆ ସ୍ବାମୁଆଃ ବିଃବକେ ୧:୧ । ତିଂଲେଃଏତ ଜାକୁବ୍ ଉଲିଆଃନେ ବେବଆର୍ ଦରକାର୍ ବିସୟ୍ ସରତେ କିସ୍‌ଟିୟାନ୍‌ଇଂନେ ନ୍‌ସା ଲେଃକେ ମାତର୍ ଗମ୍ବାର୍ କୁଟୁମ୍ ବିସୟ୍‌ରେ ବେବଆର୍ ତିଂଲେଃକ୍ଲେ ସଇ ତିଂଲେଃଏ ଜାକୁବ୍ ସ୍ବେଡାଃ ଜିଉଦି କିସ୍‌ଟିୟାନ୍‌ଇଂକେ ଗୁଆରବଗେ । ତାଗ୍ଲା ଆକେନ୍ ଉଲିଆଃ ବିନ୍‌ବିନ୍ ପାକା ଲେଃକ୍ଲେ ପଡ଼େଣ୍ଡେଇଂକେ ଆଃଝେଟା ବିସୟ୍‌ରେ ଚିକନା ବିଃବକେ । ଜାକୁବ୍ ବିସ୍‌ବାସ୍ ବାରି କାମ୍‌ନେ ପୁରା ସମ୍ପର୍କ ଆଡାଡା ଆଃଦର୍ସେଟେ ବାସଙ୍ଗ୍‌ତିଂକେ ଜେ ସଡ୍ ବିସ୍‌ବାସ୍ କାମ୍‌ନ୍ନିଆ ନ୍‌ଏ ୨:୧୭ । ମେଁ ଦନି ରେମୁଆଁଇଂନେ ନ୍‌ସା ସାପର୍ ବିସୟ୍‌ରେ ତରକ୍ ଆଃଡିଂତିଂକେ ୨:୧-୪ । ସନ୍‌ମାନ୍ ବଟେ ବାଃଲିରବାତା ତିଂନେ ବିସୟ୍‌ରେ ଶ୍ରିଗ୍ ତରକ୍ ତିଂନେ ଆଃମ୍ୟାତିଂକେ ୩:୧-୧୨ ।

## ସାସ୍ତ୍ର ବିତ୍ତେ ଲେଃକ୍ଲେ ସାମୁଆଁଇଂ

୧. ଜାକୁବ୍ ମେଁନେ ପଡ଼େଣ୍ଡେଇଂକେ ସାଲ୍‌ତିଂକେ । ୧:୧

୨. ମୋଁ କିସ୍ତିୟାନ୍‌ଇଂକେ ଦୁକ୍ ବେଲା ଡାଟ୍‌ରେ ଲେଃନେସା ସାଆସ୍ ବିଃତିଂକେ । ୧:୨-୨୭
୩. କାମ୍ ତିଂରେ ଡିରକମ୍ ବିସ୍‌ବାସ୍ ଆଃସୁଏନେ ଦର୍‌କାର୍ ତେନ୍ ବିସ୍‌ୟରେ ବାସଙ୍‌ତିଂକେ । ୨:୧-୨୭
୪. ମାପରୁ ସାମ୍‌ଆଁ ଡିରକମ୍ ବପୁ ତିଂୟାଏ ଆତେନ୍ ମୋଁ ଆଃଦର୍‌ସେ ବକେ । ୩:୧-୧୨
୫. ଜାକୁବ୍ ଇସ୍‌ପରନେ ବୁଦି ଜାଗତିକ ବୁଦିବାନ୍ ବିନ୍ ରକମ୍ ତିଂପାରେ ଆତେନ୍ ବାସଙ୍‌ତିଂକେ । ୩:୧୩-୪:୧୦
୬. ଇତିଂ ମୋଁ ପଡେଣ୍ଡେଇଂକେ ଗରବ୍ ମାତିଂନେ ନ୍‌ସା ତରକ୍ ଆଃତିଂତିଂକେ । ୪:୧୧-୫:୬
୭. ସାରାସାରି ଜାକୁବ୍ ଉଃଡ଼ିଲ୍ଲିଗ୍ ଡାଆଁ ଆଦେସ୍ ବିଚେ ମୋଁନେ ଗୁଆରନେ ଆଃଡାକେ । ୫:୭-୨୦

୧ ☆ନେଙ୍ଗ୍ ଜାକୁବ୍ ଇସ୍‌ପରନେ ବାରି ମାପୁ ଜିସୁ କିସ୍‌ଟନେ ଦାସ ସାପା ମଞ୍ଚପୁର୍‌ନ୍ନିଆ ଜତେକତେ ଡିଙ୍ଗ୍‌ଲେଃଡେ ଇସ୍‌ପରନେ ରେମୁଆଁଇଂକେ ସାଲ୍ ଆଃମ୍ୟାତେ ଏନ୍ ଉଲିଆ ଗୁଆରଣ୍ଡିଂକେ ।

### ବିସ୍‌ବାସ୍ ଆରି ବୁଦି

୨ ବୟାଁ ଆରି ତନାଇଂ ଜିବନ୍ ବୁଆ ଡିକେଃନେ ବାରବାନିନେ ଦୁକ୍‌କଷ୍ଟ ପାଂଲା ଆତେନ୍ କରମ୍‌ନେ ବିସ୍‌ୟ ଡାଗ୍‌ରେ ମ୍ୟାଃପା ।

୩ ମେଃଡାଗ୍ଲା ପେ ପେମ୍ୟାଃକେ, ଦେକ୍‌ରକମ୍ କଷ୍ଟ ସେଃମ୍‌ଠି ପାଂବେଲା ବିସ୍‌ବାସ୍ ବପୁ ଲେଃଲା ସାମାଲେନେ ସକଡ୍ ମାଲେ ତିଂଏ ।

୪ ପେ ଇଡିଙ୍ଗ୍ ଜାକ ସାମ୍‌ଲେ ପେଲେଃଲା ମେଃଡିଗ୍ ବିସ୍‌ୟରେ ଗଣ୍ଡା ମାଡିଙ୍ଗ୍‌ରେ ଜନମ୍‌ବାନ୍ ଦର୍ମ ବୁଦି ବାରି ନିମାଣ୍ଡା ପେଡିଙ୍ଗ୍‌ଏ ।

୫ ମାତର ପେଇଂନେ ବିଡ୍ରେ ଜାଣ୍ଡେନେ ଜଦି ଗ୍ୟାନ୍ ଗଣ୍ଡା ଲେଃଏ ମୋଁ ଇସ୍‌ପରନେ ଡାଗ୍ଲା ପାର୍‌ତନା ଡିଙ୍ଗ୍‌ଲେ ତେଲା ଆମେକେ ଇସ୍‌ପର ଗ୍ୟାନ୍ ବିଏ ଡାଗ୍ଲା ମୋଁ ସାର୍ଦା ମନ୍‌ରେ ଆରି ରକ୍ୟା ସୁଗୁଆ ସାପାରେକେ ଦାନ୍ ଡିଙ୍ଗ୍‌ଏ ।

☆ ୧:୧ ମାଡିଉ ୧୩:୫୫; ମାରକ ୬:୩; ପ୍ରେରିଡ୍ ୧୫:୧୩; ଗାଲାତିୟ ୧:୧୯.

୬ ମାତର ପାରତନା ତିଜ୍ଜକେଲା ଇଃକୁଣ୍ଡିଗ୍ ଅନ୍ମାନ ମାତିଂରେ ବିସ୍ବାସ୍ ତିଂରେ ସ୍ଥରେପା । ଜା ସନ୍ଦେଅ ତିଂଏ, ମେଁ ତରବର୍ ଆବୁଂକ୍ଲେ ଲଅଡି ସୁଗୁଆ ।

୭ ଦେତ୍ତରକମ୍ ରେମୁଆଁ ମାପୁନେ ଡାଗ୍ରା ମେଃଡିଗ୍ ବାଏ ଡାଗ୍ରେ ମନେ ଆଡିଜ୍ଲେ ।

୮ ମେଁ ମ୍ପାରମନ୍ ରେମୁଆଁ ନିଜର୍ ସାପା ଅଲେଜ୍ମିଆ ଆଜ୍ଆଡ୍ ।

### ସାକାର୍ ଆରି ଗରିବ୍

୯ ଦରିଦ୍ର ଅବସ୍ଥାନ୍ନିଆ ଲେକ୍ଲେ କ୍ରିସ୍ଟ ବିସ୍ବାସି ଉର୍ନତି ତିଜ୍ଜକେଲା ଗରବ୍ ତିଜ୍ଜିଆର୍ଏ ।

୧୦ ସାକାର୍ କ୍ରିସ୍ଟ ବିସ୍ବାସି ମେଁନେ ଦରିଦ୍ର ତିଜ୍ଜକେଲା ଗରବ୍ ତିଜ୍ଜିଲେ ଡାଗ୍ଲା ସାକାର୍ ଚେଃମୁଆଁ ସାରି ସୁଗୁଆ ଲଖେଏ ।

୧୧ ସିନେ ତାରାସ୍ ତାତିରେ ଚେଃମୁଆଁ ନ୍ସୁଆର୍ଖେଏ, ମେଁନେ ସାରି ଲଃଖେଏ ଆରି ସବା ନାସେଖେଏ । ଦେତ୍ତରକମ୍ ସାକାର୍ ଶ୍ରିଗ୍ ମେଁନେ ସାପା କାମ୍ ଇଂ ବିତ୍ତେ ମେଃସୁଆ ଲଚ୍ୟାଖେଏ ।

### ପରିକ୍ୟାନ୍ନିଆ ସାମ୍ନା

୧୨ ଆଣ୍ଡିନେ ରେମୁଆଁ ଦୁକ୍କସ୍ତକେ ସାମ୍ପାଲେ ଲଃଏ ମେଁ ଦନ୍ୟ; ଡାଗ୍ଲା ଦେକ୍ତରକମ୍ ପରିକ୍ୟା ଜିତେଲା ଇସ୍ପର୍ ମେଁନେ ସିସ୍ଇଂକେ ଆଣ୍ଡିନେ ଜିବନ୍ ବିଏ ଡାଗ୍ରେ ପାରମାନ୍ ତିଜ୍ଜବକେ ମେଁ ଆଡେନ୍ ପୁରୁସ୍କାର ରକମ୍ ବାଏ ।

୧୩ ଜାଣ୍ଡେଃ ପରିକ୍ୟା ଆଃଆସାନେ ସେଃମ୍ ତିଂନେ ବେଲା ଆଡେନ୍ କିତଂବାନ୍ ପାଂଲେଃକେ ଡାଗ୍ରେ ଆଏଡେଲେଃ । କିତଂ ନାଲେନେ ବିସ୍ମ୍ ନ୍ସାଃ ଆସା ଆଡିଂଆର୍ ଶୁଲେଃ ମେଁ ଆଜାକେ ଆସା ଆରାଃଡିଂ ଶୁ ।

୧୪ ଡାଗ୍ଲା ରେମୁଆଁ ନିଜର୍ ପାପ୍ କାମ୍ ତିଜ୍ଜରେ ନିଜେ ପରିକ୍ୟାନ୍ନିଆ ଲଃଏ ।

୧୫ ଦଦ୍ୟା କାମ୍ ତିଜ୍ଜନେ ବାନ୍ ପାପ୍ ଜନମ୍ ତିଜ୍ଜଏ ବାରି ଆଡେନ୍ ପାପ୍ ମ୍ପାଚେ ଜାବର୍ ତିଜ୍ଜିଲା ଗୁଏଃ ତିଜ୍ଜଏ ।

୧୬ ନିଜର୍ ବୟାଁ ବାରି ତନାଈଂ ଆଜଚେ ଆଡିଜ୍ପା ।

୧୭ ସାପା ନିମାଣ୍ଡା ଦାନ ବାରି ସାପାବାନ୍ ମ୍ବା ପୁରୁସ୍କାର କିତଂନେ ଆବା ବାନ୍ ପାଙ୍ଗଲେଃଏ । ମେଁ ସାପା ଆକେଁ ସ୍ତ୍ରି ଚାଙ୍ଗୁଆନେ ତିଆର୍ ତିଙ୍ଗ୍‌ଶ୍ରେ । ମେଁ ନ୍‌ଲୁଡ଼୍ୟା ତିଙ୍ଗ୍‌ଚେ ଆବଲ୍ଲେ ଶୁ ।

୧୮ ସାପା ଜିବ୍‌ଜନ୍ତୁ ମୁଞ୍ଚପୁର୍ ତାଗ୍ରା ନେ ତିଡିରକମ୍ ପର୍ତ୍ତୁମ୍ ଟାନ୍ ଅଦିକାର୍ ନେଡିଂଏ ଆକେନ୍‌ସା ମେଁ ନିଜର୍ ଇକ୍‌ଚାରେ ସତ୍ ସାମୁଆଁ ବାନ୍ ଆନେକେ ଆଃରେଃକେ ।

### ଦ୍ୱିତୀୟା ବାରି କାମ୍ ତିଙ୍ଗ୍‌ପା

୧୯ ନିଜର୍ ବୟାଁଇଂ ମନେ ବପା । ପେଇଂ ଅଁନେ ଜାଗ୍ରତ୍ ତିଂନେ ଦରକାର୍ ତାଗ୍ରା ମ୍ୟାଃଚେଂଚେ ସାମୁଆଁ ବାସଂପା ।

୨୦ ଗିସେଃ ତାଗ୍ରା ସାକ୍ତି ତିଂପା । ମେଃତାଗ୍ରା ରେମୁଆଁ ଗିସେ ନ୍‌ସାଃ ଇସ୍‌ପର୍‌ନେ ପବିତ୍ର ଜଜନା ସରାଃ ତିଂଏ ।

୨୧ ମାତର୍ ପେଇଂ ସାପା ରକମ୍ ଦଦ୍ୟା ଅବ୍ୟାସ୍ ଆରି ସତ୍‌ଶୁନେ କାମ୍ ଆତାର୍ ବିଃପା । ଇସ୍‌ପର୍‌ନେ ତାଗ୍ରା ନିଜେକେ ଆତାର୍ ବିଃପା ବାରି ପେନେ ଗାଗ୍‌ଡେନ୍ନିଆ ମେଁ ଆଡିନେ ବ୍ଲାଲିର୍ ବିଗ୍ ବକେ ବାରି ଆଡିନେ ଆପେକେ ରକ୍ୟା ତିଙ୍ଗ୍ ନ୍‌ସା ଇକ୍‌ଚା ଆତେନ୍ ଗ୍ରାଅନ୍ ତିଙ୍ଗ୍‌ପା ।

୨୨ ପେଇଂ ନିଜେ ନିଜେକେ ଆଜଚେଗ୍‌ପା । ମେଁନେ ସାମୁଆଁ ସରାଃ ଅଁଲା ମାଲେ ଶୁ ଆମେକେ କାମ୍‌ନ୍ନିଆ ଲାଗେପା ।

୨୩ ଆଣ୍ଡିନେ ରେମୁଆଁ ଇସ୍‌ପର୍‌ନେ ବ୍ଲାଲିର୍ ସରାଃ ଅଁଏ, କାମ୍‌ନ୍ନିଆ ବେବଆର୍ ଆଡିଙ୍ଗ୍ ଶୁ ମେଁ ଦାବ୍‌ପନ୍‌ନ୍ନିଆ ନିଜର୍ ରୁପ୍ କିକେନେ ରେମୁଆଁ ସୁଗୁଆ ।

୨୪ ମେଃ ନିମାଣ୍ଡା ତିଂଚେ ନିଜର୍ ରୁପ୍‌କେ କେଏ ତାଗ୍ରା ଆଡ୍‌ବାନ୍ ତାର୍‌ଝେକ୍‌କେ ଦାପ୍‌ଚେ ମେଃନେ ସତ୍ ରୁପ୍ ମେଃ ଆବଃବିଏ ।

୨୫ ତାଗ୍ରା ରେମୁଆଁନେ ମୁକ୍ତି ନ୍‌ସା ମୁଇଂ ବିନ୍ ନିୟମ୍ ଲେଃକେ । ଜେ ଆତେନ୍ ଅଁଚେ ଆବଆବି ଶୁ ବାରି ମେଁନେ ଆଡାଡା ସାପା କାମ୍‌ନ୍ନିଆ ମନ୍ ବିଚେ ଆତାନ୍ ପାଲନ୍ ତିଙ୍ଗ୍‌ଏ । ଇସ୍‌ପର୍ ଆତାନ୍ ସାପା କାମ୍ ତିଙ୍ଗ୍‌ଏ ।

୨୬ ଜାଣ୍ଡେଃ ମେଃଆରେ ନିଜେକେ ଦରମ୍ ମନେ ତିଂତିଂକେ ? ମେଃ ଜଦି ନିଜର୍ ନ୍ନିଆକେ ସାକ୍ତି ଆରାଃଡିଂ ତେଲା ମେଃନେ ଦରମ୍ କାମ୍ ସାପା ସରାଃ ଆରି ମେଃ ଚା ନିଜେକେ ନାଲେଡିଂକେ ।

୨୭ ଆଣ୍ଡିନେ ଦର୍ମକାମ୍ ଆବା ଇସ୍ପରନେ କେନ୍‌କେନ୍ନିଆ ପରଚଲ୍ ଆରି ନିମାଣ୍ଡା ଆତେନ୍ ତିଂଗେ ଆଃସିରେ ଉଂଗଏଃ ଆରି ଗୁଏସାଙ୍ଗକୁଏଇଂନେ ଜତନ୍ ତିଂନେ ଆରି ଦର୍ତ୍ତନିନେ ପାପ୍‌ବାନ୍ ନିଜେକେ ମୁକ୍ତି ନେଃବପା ।

## ୨

### ସାପର୍ ତିଂଚେ ବିଚାର୍

୧ ବୟାଁଇଂ ଆନେକେ ଲିବିସଃ ମାପରୁ ଜିସୁ କିସ୍‌ଟନେ ବିସ୍‌ବାସ୍‌ଶ୍ଟ୍ରେ ସୁଗୁଆ ପେଇଂ ରେମୁଆଁଇଂନେ ବିନ୍‌ନେ ସାଜବାଜ କେଚେଃ ଆଇଂସାଗେପା ।

୨ ମନେ ତିଂପା, ପେ କୁକପାର୍ ଡାଗ୍ରା ମୁଇଂଜା ସୁନା ଖାତ୍ ଆରି ଜବର୍ ଦାମ୍‌ନେ ପାଟାଇ ଖାଃଡେଗ୍‌ଚେ ପାଂଲେଃକେ । ବିନ୍‌ନେ ମୁଇଂଜା ମ୍‌ମାର୍‌କ୍‌କ୍‌ ଆରି ସ୍ୟାଃକ୍‌କ୍‌ ପାଟାଇ ଖାଃଡେଗ୍‌ଚେ ପାଂଲେଃକେ ।

୩ ଜଦି ପେ ଜବର୍ ଦାମ୍‌ନେ ପାଟାଇ ଖାଃଡେଗ୍‌ ପେଲେଃକେ ରେମୁଆଁକେ ମାଲେ ସନ୍‌ମାନ୍ ଆଃସ୍‌ପେଚେଃ ପେବାସ୍‌ଏ, “ଏନ୍ ଆସନ୍ ଗ୍ରାଅନ୍ ତିଂପା,” ଡାଗ୍ରା ଗରିବ୍ ରେମୁଆଁକେ ବାସ୍, “ଆଡ଼ଡାଗ୍ରା ତୁଆଁ, ଆରି ନିଂ ଷ୍ଟ ଆଲ କଲା,”

୪ ତେଲାଲେଃ ନିଜେ ନିଜେ ବିତ୍ରେ ମ୍‌ ଡାଆଁ ବାବ୍‌ନା ଉବ୍‌ଜେ ପେଡିଂକେ ବାରି ନାଲେନେ ମନ୍ ବାବ୍‌ନା ତିଂଚେଃ ଇଂସା ବିଚାର୍ ତିଂପେଡିଂକେ ।

୫ ନିଜର୍ ବୟାଁ ବାରି ତନାଇଂ ଅଁପା, ଇସ୍‌ପର୍ ମେଃନେ ଏନ୍ ମଞ୍ଚପୁରନେ ରେମୁଆଁକେ ବିସ୍‌ବାସ୍ ଦନ୍‌ନ୍ନିଆ ସାକାର୍ ତିଙ୍‌ନେ ବାରି ନିଜର୍ ରେମୁଆଁକେ ଆଣ୍ଡିନେ ରାଜି ବିଃନେ ପାର୍‌ମାନ୍ ତିଂବକେ, ଆତେନ୍ ଅଦିକାର୍ ତିଙ୍‌ନେ ସ୍ତ୍ରି ବକେ ।

୬ ତେଲା ପେ ଗରିବ୍‌ଶ୍ଟ୍ରେଇଂକେ ଅମାନି ତିଂପେଡିଂକେ । ଆଣ୍ଡିଶ୍ଟ୍ରେ ଆପେକେ ବଗଟୁ ତିଂଆର୍‌ଏ ଆରି ବିଚାର୍ ତୁଆ ଡାଗ୍ରା ଗୁଃତୁଂ‌ଝେଏ ମେଇଂ ଜାଣ୍ଡେଃ? ମେଇଂ ତ ଆତେନ୍ ସାକାର୍‌ଶ୍ଟ୍ରେ ।

୭ ଆଣ୍ଡିନେ ମ୍‌ ଆପେକେ ବିବକେ ମେଁଇଂ ଆତେନ୍ ମ୍‌ ମ୍‌ରେ ନିନ୍‌ଆ ତିଂଆର୍‌ଏ ।

୮ “ସାଇପଡ଼ିସାଣ୍ଡେକେ ଜିବନ୍ ସୁଗୁଆ ବଲ୍ ବାପା” ସାସ୍ତରନ୍ନିଆ ଗୁଆରକ୍ଲେ ଇସପରନେ ରାଜିନେ ଏନ୍ ନିୟମ୍ ଜଦି ପାଲେ ପେଡ଼ିଂକେ ତେଲା ପେ ନିୟମ୍ କାମ୍ ତିଂପେଡ଼ିଂକେ ।

୯ ମାତର୍ ଜଦି ବିନ୍ନେ ସାଜବାଜ କେଚେଃ ରେମୁଆଁଇଂନେ ତାଗ୍ରା ଇଂସା ବେବଆର୍ ତିଂପେଡ଼ିଂକେ ତେଲା ପେ ପାପ୍ ତିଂପେଡ଼ିଂକେ ଆରି ନିୟମ୍ ଇସାବରେ ପେ ମୁଇଂ ସାମୁଆଁ ମାସାଣ୍ଡେ ।

୧୦ ଜା ମୁଇଂ ସାମୁଆଁ ଆମାନେଃ ମେଁ ସାପା ସାମୁଆଁ ମାମାନେଃ ଅପରାଦନ୍ନିଆ ଦସି ତିଂଏ ।

୧୧ ତେସାଃ ଜାଣ୍ଡେଃ ଅଡ଼ାରେଗ୍ ଆଡ଼ିଂରେପା ତାଗ୍ରେ ବାସଙ୍ଗବଗେ, ମେଁ ତିଗ୍ ରେମୁଆଁ ଆବାଗୁଏଃଗ୍ପା ତାଗ୍ରେ ବାସଙ୍ଗବଗେ, ଏନ୍ସା ପେ ଜଦି ଅଡ଼ାରେଗ୍ ମାଡ଼ିଂଚେ ରେମୁଆଁ ପେବାଗୁଏଃଏ, ତେଲା ପେ ମୋଶାନେ ନିୟମ୍ ମାମାନେଃ ରେମୁଆଁ ତିଂପେଲେଃକେ ।

୧୨ ଆଣ୍ଡିନେ ଉଦାର ବିଣ୍ଡେ ନିୟମ୍ ବାନ୍ ପେ ବିଚାର ପେଡ଼ିଂଏ ଆଡେନ୍ ପେନେ ବାଲିରବାତା ଆରି ସ୍ଲୋଗ୍ଗାରନ୍ନିଆ ଉଡ୍ରା ଆଡିଂପା ।

୧୩ ତାଗ୍ଲା ଜା ବିନ୍ରେକେ ଆଲ୍‌ବିସଃ, ଇସପର୍ ତିଗ୍ ଆମେକେ ଆଲ୍‌ବିସଃ । ନ୍ୟାୟ ବିଚାର ଆଡ଼ାତ୍ରା ଲିବିସଃନେ ଆଃ ଜିନେଏ ।

### ବିସ୍‌ବାସ୍ ଆରି କାମ୍

୧୪ ବୟାଁ ଆରି ତନାଇଂ ଜାଣ୍ଡେଃ ଜଦି ବାସଙ୍ଗଏ ମେଁନେ ବିସ୍‌ବାସ୍ ଲେଃକେ ତେଲା କାମ୍‌ତାଗ୍ରା ଆଡେନ୍ ଆରାଃସୁଏ ଶୁ ତେଲା ମେଁ ସାମୁଆଁରେ ମେଃ ମୁଲ୍ୟ ଲେଃକେ ? ଦେଡ଼ରକମ୍ ବିସ୍‌ବାସ୍ ଆମେକେ ଉଦାର ବିୟାଏ କି ?

୧୫ ମନେ ତିଂପା ମେଃଶ୍ଚିଗ୍ ବୟାଁ କି ତନାନେ ପାଟାଇ ଆରି କାଦିନେ ଅବାବ୍ ଲେଃକେ

୧୬ ଆରି ପେନେ ବିତ୍ରେବାନ୍ ଜାଣ୍ଡେଃ ଆମେକେ ଗାଗ୍‌ଡେନେ ଦରକାର୍ ଜିନିସ୍ ମେଃଡିଗ୍ ମାବିଃଚେ ବାସଙ୍ଗଏ, ଉସୁମ୍ ଆରି ଉଗ୍‌ଚଂଚେ ସାକ୍ତିରେ ଝିଗ୍‌ଲା, ତେଲା ଆଡ଼ଅରିଆ ମେଃ ଲାବ୍ ?

୧୭ ବିସ୍‌ବାସ୍ ଟିକ୍ ଦେଡ଼ରକମ୍ । କାମ୍ ଆଲେଃଲା ବିସ୍‌ବାସ୍ ଗୁଏଝେଏ ।

୧୮ ଡାଗ୍ଲା ଜାଣ୍ଟେଃ ତ ବାସଂୟାଏ “ମୁଇଂଜାନେ ବିସ୍ବାସ୍ ଲେଃକେ ବିନ୍ ମୁଇଂଜାନେ କାମ୍ ଲେଃକେ ।” ମାତର୍ ଏନ୍ ବିସ୍ବୟରେ ନେଂ ମ୍ବାସଂଏ “କାମ୍ ମାଲେଃରେଃ ଜାନେ ବିସ୍ବାସ୍ ଲେଃୟାଏ ଡାଗ୍ରେ ଆନେଂକେ ସାକି ବିଃଲ୍ୟାପା । ନେଂ କାମ୍ବାନ୍ ନେଂନେ ବିସ୍ବାସ୍ ଲେଃକେ ଡାଗ୍ରେ ସାକି ମ୍ବିଏ ।”

୧୯ ପେ ମେଃଆରେ ବିସ୍ବାସ୍ ତିଂପେତିଂକେ ଜେ ଚାଃ ମୁଇଂଜା ମାତର୍ ଇସ୍ପର୍ ଲେଃକେ ? ନିମାଣ୍ଡା ! ସେଃଆଁରେଇଂ ଶ୍ରିଗ୍ ଦେକ୍‌ରକମ୍ ବିସ୍ବାସ୍ ତିଂଆର୍ଏ ବାରି ବୁଟ୍‌ରେଃ ତରଅର ତିଂଆର୍ଏ ।

୨୦ ଆରି ନିର୍ବୁଦି ! କାମ୍ ବିନା ବିସ୍ବାସ୍ ଜେ ମୁଲ୍ୟ ଶ୍ଟୁ ଆକେନ୍‌ନେ ସାକି କିକେନ୍‌ସାଃ ପେ ମେଃଆରେ ମନ୍ ତିଂପେତିଂକେ ?

୨୧ ନେଃ ଅଃସେନେ ଆବା ଅବ୍ରାହାମ୍ ଇସ୍ପର୍‌ନେ ମୁଆଃନ୍ନିଆ ଡିତିରକମ୍ ଦରମ୍ ରେମୁଆଁ ସୁଗୁଆ ତିଂଲେଃଆର୍‌ରେ ? ମେଁ କାମ୍ ବାନ୍ ଦରମ୍ ରେମୁଆଁ ରକମ୍ ତିଂକେ ଉଡିବେଲା ମେଁ ମେଁନେ ଉଙ୍ଗ୍‌ଡେ ଇସାକ୍‌କେ ବେଦି ଆରାଡ୍ରା ମାପ୍‌ରୁକେ ଅପେଃକେ ।

୨୨ ପେ ମେଃଆରେ ବୁଜେ ପେୟାକେ ? ଅବ୍ରାହାମ୍‌ନେ ବିସ୍ବାସ୍ କାମ୍‌ଡାଗ୍ରା ଉଡ୍ରା ତିଂକେ; କାମ୍ ବାନ୍ ମେଇଂନେ ବିସ୍ବାସ୍ ପୁରନ୍ ତିଂକେ ।

୨୩ ଆକେନ୍ ବାନ୍ ଦର୍ମସାସ୍ତ୍ରନେ ଗୁଆର୍‌କ୍ସେ ସାମୁଆଁ ପୁରନ୍ ତିଂକେ: “ଅବ୍ରାହାମ୍ ଇସ୍ପର୍‌କେ ବିସ୍ବାସ୍ ତିଂକେ ବାରି ମେଁଇଂନେ ବିସ୍ବାସ୍ ନ୍‌ସାଃ ଇସ୍ପର୍‌ନେ ମ୍‌ମୁଆଃନ୍ନିଆ ମେଁ ଦରମ୍‌ରେ ଡାଗ୍ରେ ଇସାବ୍ ତିଂକେ ।” ବାରି ଅବ୍ରାହାମ୍ ଇସ୍ପର୍‌ନେ ସାଙ୍ଗାଡି ଡାଗ୍ରେ ଅଃସାମୁଆଁ ଆର୍‌କେ ।

୨୪ ତେଲା ପେଇଂ ବୁଜେ ପେୟାଏ ଜେ ରେମୁଆଁ କାମ୍‌ବାନ୍ ଦରମ୍‌ରେ ଡାଗ୍ରେ ସାମୁଆଃଏ ଚାଃ ବିସ୍ବାସ୍ ନ୍‌ସାଃ ଶ୍ଟୁ ।

୨୫ ଦେଡ୍‌ରକମ୍ ଦାରିବଏ ରାହାବ ଶ୍ରିଗ୍ କାମ୍ ନ୍‌ସାଃ ଦରମ୍‌ରେ ତିଂଲେଃରେ । ମେଁ ଇଶ୍ଟାଏଲ୍‌ନେ ତଂକେଡେଇଂକେ ଚାନ୍ ବିଃବରେ ବାରି ବିନ୍ ମୁଇଂ ଗାଲିପାକା ଲାଗ୍‌ଡନ୍‌ସାଃ ସାଇଜ ତିଂବରେ ।

୨୬ ଆଡେନ୍‌ସାଃ ଆମ୍ ଆଲେଃଲା ଗାଗ୍‌ଡେ ଡିତିରକମ୍ ଗୁଏଃଏ କାମ୍ ଆଲେଃଲା ବିସ୍ବାସ୍ ଦେଡ୍‌ରକମ୍ ଗୁଏଃଏ ।

# ୩

## ସାନ୍ତି କ୍ଲିଆ

<sup>୧</sup> ଆରି ବୟା ଆରି ତନାଇଁ ପେଇଁନେ ବିତ୍ତେ ଗୁଲୁଏ ରୁଆ ଦରମ୍ ସିକ୍ୟା ଗୁରୁ ତିଁନେ ଦରକାର୍ ଶୁ । ତାଗ୍ଲା ପେ ପେମ୍ୟାଃକେ ଜେ ନେ ସୁଗୁଆ ଗ୍ରଇଁ ବିନ୍ ରେମୁଆଁବାନ୍ ମାଲେ କଷ୍ଟ ବାବରେ ବିଚାର୍ ତିଆରଏ ।

<sup>୨</sup> ନେ ସାପାରେ ଗୁଲୁଏ ତର ବୁଲ୍ ତିଁନେଃବଏ । ଜଦି ଜାଣ୍ଡେଃ ମେଁନେ ବାଃଲିରବାତାନ୍ନିଆ ଅଃନାତିଗ୍ ବୁଲ୍ ଆତିଁ ଶୁ ତେଲା ମେଁ ପୁରନ୍ ଆରି ନିଜେକେ ପୁରା ସାନ୍ତି ତିଁୟାକେ । ସାପା ଗାଗ୍ଡେକେ ତିଗ୍ ନିଜେନେ ଅଦିକାର୍ରେ ବବନେ ଯାଏ ।

<sup>୩</sup> ଗଡ଼ାକେ ନିଜର୍ ଦାଇଡ଼ରେ ବନେନ୍ସାଃ ନେ ଲାଗାମ୍ ନେଃବିଃଏ ଆରି ନେଃନେ ଇକ୍ତା ଅନୁସାରେ ମେଁନେ ଗାଗ୍ଡେକେ ଆଃଅଲେଙ୍ଗ୍ ନେଃୟାଏ ।

<sup>୪</sup> ମୁଇଁ ମ୍ବାଃ ଜାଆଜ୍ ବିସୟରେ ନେଃଗାପା । ଜାଆଜ୍ ଆଃକିରଣ୍ଡେ ମାଲେ ଝେଡ଼୍ୟାଃ ପାଁତିଲା ଶ୍ରିଗ୍ ଉଦିଗ୍ ତାଆଁ ପୁଗ୍ ଏଃତେ ଆମେକେ ଅନ୍ମାନ୍ ତିଁରେଃ ଇକ୍ତା ଅନୁସାରେ ଆଃକିର୍ ତୁଁଝେଏ ।

<sup>୫</sup> ଆକେନ୍ ଉଦାଅରନ୍ କ୍ଲିଆ ତାଗ୍ଲା ଲେଃକେ । ଆତେନ୍ ତାଆଁ ତିଲା ଶ୍ରିଗ୍ ମ୍ବାଃ ମ୍ବାଃ ସାମୁଆଁ ବାସଂରେଃ ଗରବ୍ ତିଁୟାଏ । ନେଃଗା କେଲାପା ତିଡ଼ିରକମ୍ ମାଃସ୍ ତିଲାଶ୍ରିଗ୍ ମ୍ବାଃ କଣ୍ଡାକେ ଆଗିଃ ବିଃଏ ।

<sup>୬</sup> କ୍ଲିଆ ସୁଆ ସୁଗୁଆ; ଗୁଲୁଏ ନାଲେ ବିସୟରେ ନ୍ଲେଃକେ; ବାରି ଆତେନ୍ ନେଃନେ ଗାଗ୍ଡେ ବିତ୍ତେ ଲେଃକେ ନ୍ସାଃ ନାଲେ ବପୁ ବେପ୍ରେରେଃ ନେଃନେ ସର୍ତ୍ତେ ଜିବନ୍କେ ପାପ୍ ଆତିଁଏ । କ୍ଲିଆନେ ନର୍କ୍ ସୁଆ ନେଃନେ ସାପା ଜିବନ୍କେ ଆଃଗିଃବିଏ ।

<sup>୭</sup> ରେମୁଆଁ ସର୍ତ୍ତେ କଣ୍ଡାଜନ୍ତୁ ପୁଗ୍ ବୁବଃ ଗିଡ଼ିଆ କେଣ୍ଡିଆନ୍ନିଆ ଲେଃନେ ଜିବ୍କେ ନିଜର୍ ଅଦିକାର୍ରେ ବ ଯାକେ ।

<sup>୮</sup> ମାତର୍ ଜାଣ୍ଡେଃ ଅଃନା କ୍ଲିଆକେ ନିଜର୍ ଅଦିକାର୍ ଆତିଁ ଆୟାକେ ଶୁ । ଆତେନ୍ ମିର୍ ଆରି ବାଗୁଏତୁଗୁଏ, ମାଲେ ଝିଆଃ ରିଙ୍ଗ୍ଆଃନ୍ନିଆ ଆତେନ୍ ନ୍ଲେଃକେ ।



୯ ନେ ଛିଆ ଏଃତେ ମାପରୁ ଆବା ଇସ୍ପରକେ ଦନ୍ୟବାଦ୍ ନେଃବିଃ । ବାରି ଆକେନ୍ ଛିଆ ଏଃତେ ଇସ୍ପରନେ ସୁଗୁଆ ଆରେକ୍ଲେ ରେମୁଆଁକେ ସେବ୍ ଶ୍ରିଗ୍ ବିଃଲେଃ ।

୧୦ ଆତେନ୍ ମୁଇଁ ତୁମୁଆଃବାନ୍ ଦନ୍ୟବାଦ୍ ଆରି ସେବ୍ ତରସାଏ । ବୟାଁଇଁ ଦେକରକମ୍ ତିଁନେ ଦରକାର୍ ।

୧୧ ମୁଇଁ ଜରନାବାନ୍ ଯେ\_କ୍ଲେ ଆରି ବିସେଃକ୍ଲେ ଶ୍ରିଆଃ ଜୟାଃ ଯାଏ କି ?

୧୨ ବୟାଁଇଁ ଲିଖା ସ୍ମାଃତାଗ୍ରା ମେଃଆରେ ଜିତ୍ ରୁଚୁଡ୍ରେ ରୁଏ ? ଅଜ୍ଞୁର୍ ଲଲିତାଗ୍ରା ମେଃଆରେ ଲିଖା ରୁଏ ? ଦେତରକମ୍ ବିତିଗ୍ତ୍ୟାଃ ଜରନାବାନ୍ ଯେ\_କ୍ଲେ ଶ୍ରିଆ ତାର୍ ଆୟାଣ୍ଟୁ ।

### କିତଂବାନ୍ ପାଞ୍ଜକ୍ଲେ ଗ୍ୟାନ୍

୧୩ ପେଇଁନେ ବିତ୍ରେ ଜାଣ୍ଟେଃ ମେଃଆରେ ଗ୍ୟାନ୍ ଆରି ବୁଦିଶ୍ଟେ ? ମେଁ ଗିଆନ୍ ଆରି ଦରମ୍ ଏଃତେ ସତକାମ୍ ତିଁଚେଃ ମେଁ ଜିବନ୍ରେ ଆକ୍ଲେନେ ସାକି ବିଃଲେଃ ।

୧୪ ତାଗ୍ଲୁ ଜଦି ପେନେ ଉଦେନେ ଇଂସା ଆକ୍କାର୍ ଆରି ବିସେଃକ୍ଲେ ବାବ୍ରେ ଲେଃକେ ନିଜର୍ ବୁଦି ଆରି ଗିଆନ୍ ନସାଃ ଗର୍ବ୍ ତିଁଚେ ସତ୍ତନେ ଆଆଁକ୍ତାର୍ଗେପା ।

୧୫ ଦେକରକମ୍ ଗ୍ୟାନ୍ ଇସ୍ପରନେବାନ୍ ଆପାଂ ଶ୍ଟୁ ଆତେନ୍ ଦର୍ତ୍ତନିବାନ୍, ଗାଗ୍ଡେବାନ୍, ସଇତାନ୍ବାନ୍ ପାଏ ।

୧୬ ଆଣ୍ଡିତାଗ୍ରା ଇଂସା ଆରି ଆକ୍କାର୍ ଆଡ୍ତାଗ୍ରା ଝିଂଆଃରିଂଆଃ ଆରି ସାପା ରକମ୍ ଅସାକ୍ତି ଆରି ଦଦ୍ୟା କାମ୍ ଲେଃଏ ।

୧୭ ମାତର୍ ଆଡ୍ତାତ୍ରାବାନ୍ ପାଂକ୍ଲେ ଗ୍ୟାନ୍ ପର୍ତୁମ୍ନେ ତିଁକେ ପବିତ୍, ଆତେନ୍ ଶ୍ରିଗ୍ ସାକ୍ତି ବିଃଶ୍ଟେ, ସୁକ୍ସାକ୍ତି ଆରି ସାପାରେନେ ମୁଇଁ ମନ୍ । ଆତେନ୍ ଲିବିସଃ ନ୍ଲେଃକେ ଆରି ଗୁଲୁଏ ଏତେ ସୁଗୁଆ ସତକାମ୍ ସୁଗୁଆ ରୁଚୁଡ୍ରେ ଆଃରୁଏ; ଆତେନ୍ ସଦେଅ ଆରି ମିର୍ ଶ୍ଟୁ ।

୧୮ ସାକ୍ତି ଆଃରେଶ୍ଟେଇଁନେ ବାନ୍ ବିଗ୍ଗ୍ନେ ଚୁବାନ୍ ଦରମ୍ ରକମ୍ ରୁଚୁ ଖେୟାଏ ।



ଇସ୍ପରନେ ତାଗ୍ରା ନେଡିଙ୍ଗାପା

୧ ପେଇଁନେ ବିତ୍ତେ ଜବର ଆରି କିରମର ମେନ୍‌ସାଃ ତିଂଏ ?  
ପେନେ ଉର୍ଦ୍ଦେ ଲାଗେ ଲେଃଢେ ଗାଗ୍‌ଡେନେ ଇକ୍‌ତା କାମ୍‌ଇଂ ଆଃ  
ଆକେନ୍‌ନେ କାରନ୍ ।

୨ ଡାଗ୍ଲା ପେ ମେଃନି ବାନେ ନ୍‌ସାଃ ମନ୍ ତିଂପେତିଂକେ ଆଡେନ୍  
ବାପେୟାଲା ବାଗୁଏଃ ନ୍‌ସାଃ ଏଡେ ପେତିଂକେ । ମେଃନି ବାନେ ନ୍‌ସାଃ  
ପେନେ ମାଲେ ମନ୍ ତିଂଏ ଆଡେନ୍ ପେବାଲା କିରମର ଆରି ରିଂଆଃ  
ପେତିଂକେ । ପେ ଇସ୍‌ପର୍ ବିସ୍‌ୟ୍ ମାବାନେ କାରନ୍ ତିଂତିଂକେ ପେ  
ଇସ୍‌ପର୍‌କେ ସେଲିଆ ପେବଣ୍ଡୁ ।

୩ ବାରି ସେଲିଆଃଲା ଶ୍ରିଗ୍ ମାବାନେ କାରନ୍ ତିଂତିଂକେ  
ପେ ସାଲିଆନେ ସଡ୍ ଶ୍ରି । ପେଇଁ ନିଜର୍‌ନେ ସୁକ୍ ବାନ୍‌ସାଃ  
ସାଲ୍ୟାଃପେତିଂକେ

୪ ଆରି ବିସ୍‌ବାସ୍‌ନ୍ନିଆ ବିସ୍ ବିଶ୍ରେ ପେ ମେଃଆରେ ପେମ୍ୟାଃକେ ?  
ସଂସାର୍ ଆସାଇ ଜା ଇସ୍‌ପର୍‌ନେ ଡାଗ୍ଲା ବିରଦ୍ ତିଂଏ ? ଜା ଆକେନ୍  
ଦର୍ତ୍ତନି ଏଡେ ସାଙ୍ଗ୍ ତିଂଏ ମେଁ ଇସ୍‌ପର୍‌ନେ ସଡ୍ ।

୫ ସାସ୍‌ରନେ ଆକେନ୍ ସାମୁଆଁନ୍ନିଆ ମେଃଆରେ ସଡ୍ ଶ୍ରି ଡାଗ୍‌ଡେ  
ମନେ ତିଂପେତିଂକେ “ଇସ୍‌ପର୍ ନେଇଁନେ ଡାଗ୍ଲା ମୁଃଡି ଆମ୍ ତିଆର୍  
ତିଂବକେ ଆମେକେ ସାପା ଅଦିକାର୍ ତିଂନ୍‌ସାଃ ମେଁ ଏଡେତିଂଗେ ?”

୬ ଡାଗ୍ଲା ଇସ୍‌ପର୍ ମୁଡି ଦୟା ବିଃତିଂକେ ଆଡେନ୍ ମାଲେ ବପୁ ।  
ସାସ୍‌ରନ୍ନିଆ ଗ୍ଲୁଆର୍ ଲେଃଢେ “ଇସ୍‌ପର୍ ଆଂକାର୍‌ଶ୍ରେ\_ଇଁନେ ବିରଦ୍  
ତିଂଏ ଡାଗ୍ଲା ଦରମ୍ ରେମୁଆଁଇଁକେ ଦୟା ତିଂଏ ।”

୭ ତେଲା ଇସ୍‌ପର୍‌ନେ ଡାଗ୍ଲା ନିଜେକେ ସର୍‌ପେ ବିଃପା ।  
ସସ୍‌ତାନ୍‌କେ ଆଗୁଏବିଃପା । ତେଲା ମେଁ ପେଇଁନେ ଡାଗ୍ଲାବାନ୍  
ଲାଗ୍‌ତଏ ।

୮ ଇସ୍‌ପର୍‌ନେ ଡାଗ୍ଲା ଲାଲାପା ଆରି ମେଁ ପେନେ ଡାଗ୍ଲା ଲେଃଏ ।  
ଅ ପାପିସ୍‌ ପେନେ କ୍ରି ପବିତ୍ର ଆତିଂ । ଅ ମ୍‌ୟାର୍‌ମନ୍ ମନ୍ ପବିତ୍ର ତିଂପା

୯ ନେଃଗାପା ଅଃନେ ଆରି ବଗ୍‌ଲଟୁଲଃ ଅଃପା; ପେଇଁନେ  
ଲୁଆଃନେ ଆରି ମ୍ଲେଡିଆ ବିସ୍‌ନ୍ନିଆ ମିସୁଃ ଝେଲେଃ;

୧୦ ମାପରୁନେ ସେଃମ୍ ଦରମ୍ ତିଂପା । ତେଲା ମେଁ ଆପେକେ  
ଉର୍ନତି ଆଃତିଂଏ ।

ବିନ୍‌ରେନେ ବିଚାର୍ ଆତିଂଗେପା

୧୧ ଅ ବୟାଁ ଆରି ତନାଇଁ ନିଜେ ନିଜେ ବିତ୍ତେ ବିଚାର୍ ଆଡ଼ିଂଗେପା । ବିସ୍ବାସି ବୟାଁନେ ବିଚାର୍ ତିଂଚେ ଜାଣ୍ଣେଃ ମେଁନେ ବୁଦି ତିଂଏ ନିୟମ୍‌ନେ ବିଚାର୍‌ଣ୍ଣେ ମାଡ଼ିଂଚେ ମେଁନେ ପାଲନ୍‌ଣ୍ଣେ ତିଂପା । ଆକେନ୍‌ ତ ପେଇଁନେ କାମ୍ ।

୧୨ ଇସ୍‌ପର୍ ଆଃ ମୁଇଁତା ନିୟମ୍ ବିଃଣ୍ଣେ ଆରି ବିଚାର୍ ତିଂଣ୍ଣେ । ଆଡେନ୍‌ସା ପେ ଜାଣ୍ଣେ ଜେ ସାଇପଡ଼ିସାନ୍‌ନେ ବିଚାର୍ ତିଂପେଡ଼ିଂକେ ।

### ଆମ୍ବା ଗରବ୍

୧୩ ପେଇଁନେ ବିତ୍ତେ ଜାଣ୍ଣେ ଜାଣ୍ଣେ ଆଂକାର୍ ତିଂଚେ ବାସଂଆର୍‌ଏ, “ନେ ଏଃକେ ଲେଃ ଝଡ଼େ ଅମ୍‌କ ଇନି ନେଃଝେ ଆଡ଼ତାଗ୍ଲା ମେମୁଆଁ ନେଃଲେ ଆରି ବେପାର୍‌ବାର୍ ତିଂଚେ ମାଲେ ତାରୁ ନେଃଆର୍‌ଜେ”

୧୪ ତାଗ୍ଲା ଝଡ଼େ ନା ଜିବନ୍‌ରେ ମେଁନେ ଗଟେଏ ଆଡେନ୍‌ ପେମ୍ୟାକେ । ପେନେ ଜିବନ୍‌ ତାଉଲଃ ସୁଗୁଆ ପ୍ରେକ୍ ଆଃ ନାଚେ ପ୍ରେକ୍ ଆଃ ଆନ୍‌ା ଶୁ ଦେଡ଼ରକମ୍ ପେଇଁନେ ଜିବନ୍‌ ରକମ୍ ।

୧୫ ତେସା ପେନେ ବାସଙ୍‌ନେ ଦରକାର୍ “ମାପୁନେ ଇକ୍‌ତା ତିଙ୍‌ଲାନେ ମ୍‌ଲେଃଚେ ଏନ୍‌ ନେଃଡ଼ିଂ ଆରି ଆଡେନ୍‌ ନେଃଡ଼ିଂ ।”

୧୬ ତାଗ୍ଲା ଏବେ ପେଇଁ ଆଂକାର୍ ତିଂଚେ ଆମ୍ବା ଗର୍ବ୍ ତିଙ୍‌ ପେଡ଼ିଙ୍‌କେ । ଆମ୍ବା ଗର୍ବ୍ ଦଦ୍ୟା ତିଙ୍‌ଏ ।

୧୭ ମନେ ବପା ମୁଡ଼ି ରେମୁଆଁ ମେଃଡ଼ିଗ୍ ସଡ଼କାମ୍ ତିଂନେ ଚିକ୍‌ ତାଗ୍‌ଚେ ମ୍ୟାଃଚେ ତିଗ୍ ଆଡେନ୍‌ ଆଡ଼ିଂଶୁ ମେଁ ପାପ୍ ତିଂଏ ।

## ୫

### ସାକାର୍‌ଇନ୍‌ସା ତରକ୍ ସାମୁଆଁ

୧ ଅ ସାକାର୍ ରେମୁଆଁ ନେଂ ସାମୁଆଁ ଅଁପା । ପେନେ ଆଣ୍ଣିନେ ଅସ୍‌ବିଦା ତିଂନେ ଝେଡ଼ିଂକେ ଆଡେନ୍‌ସା ମନେ ଏଡେରେ ଅଃପା ।

୨ ପେନେ ଦନ୍‌ ସମ୍‌ତି ନାସେ ଝେଡ଼ିଂକେ ଆରି ପାଟାଇପୁଟାଇ ତାଃଡ଼ିର୍ ଚଂଡ଼ିଂକେ ।

୩ ପେନେ ସୁନା ଆରି ରୁପା ଏଡ଼େଃ ତିଂକେ ଆରି ଆକେନ୍‌ନେ ତାଃଡ଼ିର୍ ପେନେ ବିରଦ୍‌ରେ ସାକି ବିଃଏ ଆରି ପେନେ ଗାଗ୍‌ଡ଼େ ସୁଆ ସୁଗୁଆ ଗିଃ ଝେଏ । ଆକେନ୍‌ନେ ସାରାସାରି ବେଲା ପେଇଁ ଦନ୍‌ ସମ୍‌ତି ରାଃସିଙ୍‌ ପେବକେ ।

୪ ପେନେ ଲିଜ ସ୍ନେଡ଼ିଂକ୍ଲେ ସ୍ନେରେଇଂକେ ବୁଡ଼ି ପେବିକେ ଶୁ ।  
 ମେଇଂନେ ସାମୁଆଁ ଦ୍ଵିଗ୍ । କିଆଉଆ ଝେଣ୍ଡେଇଂନେ ଅଃକ୍ଲେ ସାପାନେ  
 ବପୁଣ୍ଡେ ମାପୁରୁ ଇସପର୍ ଅଲେଃକେ ।

୫ ଆକେନ୍ ଦର୍ତ୍ତନିନ୍ନିଆ ପେନେ ଜିବନ୍ ସୁକ୍ସାନ୍ତି ତିଂଖେଗେ  
 । ଗୁଗୁଏଃନେ ଦିନ୍ ନସା ଲେଃକ୍ଲେ ପଶୁ ସୁଗୁଆ ପେ ଗାଗଡ଼େ  
 ପେଲେଃକେ ।

୬ ପେ ନିର୍ଦ୍ଦସ୍ ରେମୁଆଁଇଂକେ ଦସି ତାଗ୍ତେ ବାଗୁଏଃପେଡ଼ିଂକେ,  
 ମେଁଇଂ ପେନେ ବିରଦ୍ ତିଂ ଆୟାଆରକେ ।

**ସାଆସ୍ ତିଂରେ ପାରତନା ତିଂପା**

୭ ଅ ବୟା ଆରି ତନାଇଂ ମାପୁ ପାଙ୍ଗ୍ନେ ଜାକ ବରକସ୍ ତିଂପା ।  
 କେଲାପା ଲିଜ ସ୍ନେରେ ତିରକମ୍ ମେଃନେ ଲିଜନ୍ନିଆ ଜାବର୍ କିଆ  
 ଆକ୍ଲେନସା ବରକସ୍ ତିଂରେ ପର୍ତୁମ୍ ଆରି ଇଡ଼ିଙ୍ଗ୍ ଗୁର୍ନେ ଶୁଆକେ  
 ଉର୍ଲେଃଏ ।

୮ ଦେଡ଼ରକମ୍ ପେଇଂ ଶୁଗ୍ ବରକସ୍ ତିଂରେ ଉର୍ ଲାଃଲାପା  
 । ପେଇଂନେ ଆସା ନିମାଣ୍ଡା ଲେଃଲେ ତାଗ୍ଲା ମାପୁ ପାଙ୍ଗ୍ନେ ଦିନ୍  
 ପିଙ୍ଗ୍ଟାକେ ।

୯ ଅ ବୟା ବାରି ତନାଇଂ ପେଇଂ ତିରକମ୍ ବିଚାରନ୍ନିଆ ଆଡ଼ିଙ୍ଗ୍ପା  
 ଏନ୍ସା ନିଜର୍ ନିଜର୍ ବିଡ଼େ ବିଚାର୍ ଆଡ଼ିଙ୍ଗ୍ପା । ବିଚାର୍ ତିଂଣ୍ଡେ  
 ଶୁସାଙ୍ଗ୍ ତାଗ୍ଲା ପାଙ୍ଗ୍ ଲେଃକେ ।

୧୦ ଅ ବୟା ଆରି ତନାଇଂ ମୁଡ଼ିନେ ବାବବାଦିଇଂ ମାପୁରୁନେ ମ୍ପିରେ  
 ସାମୁଆଁ ବାସାଆର୍ଗେ ଆମେଇଂକେ ସାଆସ୍ ଆରି କସ୍ ବାନେ ଉଃସ୍ତା  
 ରକମ୍ ମନେ ଏଡେପା ।

୧୧ ମେଇଂନେ ସାଆସ୍ ନସାଃ ନେ ଆମେଇଂକେ ସୁକ୍ ରେମୁଆଁ  
 ତାଗ୍ତେ ନେଃବାସ୍ୟୁ । ପେ ଆୟୁବନେ ବରକସ୍ ସାମୁଆଁ  
 ଅପେଲେଃକେ ଆରି ଇଡ଼ିଂ ମାପୁରୁ ତିଡ଼ିରକମ୍ ଆମେକେ ଆସିବାଦ୍  
 ତିଂବକେ ଆଡେନ୍ ମ୍ୟାଃପେଲେଃକେ । ତାଗ୍ଲା ମାପୁରୁ ଦୟା ଆରି  
 ଲିବିସଃ ତିଂମ୍ୟାକେ ।

୧୨ \*ଆରି ବୟା ଆରି ତନାଇଂ ପାରମାନ୍ ତିଂନେବେଲା କିତଂ  
 କି ଦର୍ତ୍ତନି କି ବିନ୍ ବିସଏରେ ପାରମାନ୍ ଆଡ଼ିଙ୍ଗ୍ପା । ନାଁନେ

☆ ୫:୧୨ ମାଡ଼ିଉ ୫:୩୪-୩୭.

“ଅଃଅଁ”ନେ ଅରତ “ଅଃଅଁ” ଡିଲେ “ଶୁ”ନେ ଅରତ “ଶୁ” ଡିଲେ ।  
ତେଡ଼ଲା ପେ ଇସପରନେ ବିଚାରନ୍ନିଆ ଡଣ୍ଡ ପେବା ଶୁ ।

୧୩ ପେଇନେ ବିତ୍ରେବାନ୍ ଜାଣ୍ଡେଃ ମେଃଆରେ ଅସ୍ବିଦା  
ଡିଂପେଲେଃକେ ? ମେଁ ପାରତନା ଡିଲେ ? ଜାଣ୍ଡେଃ ମେଃଆରେ  
ସାରଦା ପେଲେଃକେ ? ମେଁ ମାପୁରୁନେ ଅସ୍ବମାର୍ ସାରଲେଃ ।

୧୪ ✧ଜାଣ୍ଡେଃ ମେଃଆରେ ଆଃସିଲେଃକେ ? ମେଁ ମଣ୍ଡୁଲିନେ  
ନେତାଇକେ ଖାଲେ; ମେଇଁ ମାପୁରୁ ମିରେ ଖୁ ଲିଗତେ ମେଁ ନ୍ସା  
ପାରତନା ଡିଆରଲେ ।

୧୫ ଦେକରକମ୍ ତାଟ୍ ବିସ୍ବାସ୍ ପାରତନା ଆଃସିରେକେ ନିମାଣ୍ଡା  
ଆଃଡିଂଏ । ମାପୁରୁ ଆମେକେ ନିମାଣ୍ଡା ଆଃଡିଂଏ ଆରି ଜଦି ମେଁ ପାପ୍  
ଡିଂବଏ ଆମେକେ କେମା ଡିଂଏ ।

୧୬ ନିଜର୍ ନିଜର୍ ତାଗ୍ରା ନିଜର୍ ନିଜର୍ ପାପ୍ ସାମୁଆଁ ବାସଙ୍ଗପା  
ବାରି ନିଜର୍ ନିଜର୍ ନ୍ସା ପାରତନା ଡିଂପା । ତେଡ଼ଲା ପେ ନିମାଣ୍ଡା  
ପେଡିଂଏ । ଦାମ୍ କନେ ପାରତନା ଜବର୍ ବପୁ ଆରି ଗୁଲୁଏ କାମ୍  
ପୁରନ୍ ଡିଂୟାଏ ।

୧୭ ଏଲିୟ ନେଃ ରକମ୍ ରେମୁଆଁ ଲେଃଗେ । ଶୁଆ ଆଗୁର୍ଲେଃ  
ତାଗ୍ତେ ମେଁ ମୁଇଁ ମନରେ ପାରତନା ଡିଂବଗେ ଖିମୁଆଁ ତେଃପିଆ  
ଜାକ ଦେସନ୍ନିଆ ଶୁଆ ଆଗୁର୍କେ ଶୁ ।

୧୮ ମେଃ ଆର୍ମୁଇଂତର୍ ପାରତନା ଡିଂକେ ଆରି କିତଂଇନିବାନ୍  
ଶୁଆଃ ଗୁର୍କେ, ଆରି ଦର୍ତନି ଆର୍ମୁଇଂତର୍ କିଆଉଆଃ ଲେକେ ।

୧୯ ଅ ବୟାଁ ଆରି ତନାଇଁ ପେଇନେ ବିତ୍ରେବାନ୍ ଜାଣ୍ଡେ ଜଦି ଗାଲି  
ଉମୁଆଃ ଖେଏ ବାରି ବିନ୍ରେ ମୁଇଂତା ଆମେକେ ସଡ଼ ଗାଲି ପାକା  
ଆଣ୍ଡେ ତୁଂପାଏ

୨୦ ✧ତେଲା ମନେ ବପା ଜା ବିନ୍ ଗାଲିବାନ୍ ପାପିକେ ଆଣ୍ଡେ ଖା  
ତୁଂପାଏ ମେଁ ଆତେନ୍ ପାପିନେ ଆମାକେ ଗୁଗୁଏନେବାନ୍ ରକ୍ୟା  
ଡିଂଏ ଆରି ମେଁ ନିଜର୍ନେ ଗୁଲୁଏ ପାପ୍ କେମା ଡିଂଏ ।

**ସତ୍ ଗାଳି**  
**The New Testament in the Gata' language of India: ସତ୍**  
**ଗାଳି (Bible)**

copyright © 2020 The Word for the World International

Language: Didayi (Gata')

Contributor: The Word for the World International

**ସତ୍ ଗାଳି**  
**ଯାଶୁ ମାପୁରୁନେ ନି ନିଅମ୍, 2020**

The Gata Didayi Testament Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-09

---

PDF generated using Haiola and XeLaTeX on 18 Mar 2025 from source files dated 9 Apr 2023

cd536811-9eb4-56d5-9546-afaca24c958c